



Na osnovu člana 71. stav 3. Zakona o rudarstvu Federacije Bosne i Hercegovine („Službene novine Federacije BiH“, broj 26/10), federalni ministar energije, rudarstva i industrije donosi

PRAVILNIK

o uslovima koje moraju ispunjavati pravna lica za izradu Elaborata o kategorizaciji ugljenih slojeva i jama i razvrstavanje jamskih prostorija prema stepenu opasnosti od metana i Elaborata o klasifikaciji i kategorizaciji jame, odnosno jamskih prostorija prema stepenu opasnosti od eksplozivne ugljene prašine u pogledu osposobljenosti i opremljenosti i postupku njihovog odobrenja

I. OPĆE ODREDBE

Predmet pravilnika

Član 1.

Ovim Pravilnikom se propisuju uslovi koje moraju ispunjavati pravna lica za izradu Elaborata, i to Elaborata o kategorizaciji ugljenih slojeva i jama i razvrstavanje jamskih prostorija prema stepenu opasnosti od metana (u daljem tekstu: Elaborat za metan) i Elaborata o klasifikaciji i kategorizaciji jame, odnosno jamskih prostorija prema stepenu opasnosti od eksplozivne ugljene prašine (u daljem tekstu: Elaborat za prašinu), uslovi za odgovorna i ostala lica na izradi Elaborata, uslovi za laboratorije, utvrđivanje liste nosilaca izrade Elaborata, podnošenje zahtjeva za kategorizaciju, uslovi formiranja i rad komisije.

Sadržaj Elaborata, predmet je posebnog Pravilnika.

II. USLOVI ZA IZRADU ELABORATA

Uslovi za pravna lica

Član 2.

Zbog specifične sigurnosne problematike koja se obrađuje Elaboratima, te obaveznog postupka mjerenja metana i zaprašivosti i uzimanja uzoraka u rudarskim objektima i prostorijama za potrebna laboratorijska ispitivanja ovim Pravilnikom, pored uslova propisanih čl. 72. i 73. Zakona o rudarstvu Federacije Bosne i

Hercegovine (u daljem tekstu: Zakon), propisuju se i dodatni uslovi koje pravno lice mora ispunjavati za:

- stručna lica angažovana na izradi Elaborata;
- laboratorije za tehnička ispitivanja i utvrđivanje eksplozivnih pokazatelja ugljene prašine.

Član 3.

Elaborate iz člana 1. ovog Pravilnika može izrađivati pravno lice registrovano za obavljanje djelatnosti iz područja M - Stručne, naučne i tehničke djelatnosti, razvrstane u razred:

- 71.12 Inženjerske djelatnosti i s njima povezano tehničko savjetovanje, koji uključuje „Izradu projekata iz područja rudarstva“,
- 71.20 Tehničko ispitivanje i analiza, koji uključuje proučavanje fizikalnih, hemijskih i ostalih analitičkih ispitivanja svih vrsta materijala, a sve shodno Odluci o klasifikaciji djelatnosti BiH 2010 („Službeni glasnik BiH“, br. 47/10), uz ispunjavanje i ostalih uslova propisanih ovim Pravilnikom.

Član 4.

Da bi moglo obavljati poslove izrade Elaborata iz člana 1. ovog Pravilnika pravno lice mora imati u radnom odnosu najmanje tri (3) zaposlenika visoke stručne spreme, od čega najmanje jednog diplomiranog rudarskog inženjera, koji ima položen stručni ispit za tehničko rukovođenje i najmanje pet (5) godina radnog iskustva u struci, od čega najmanje tri (3) godine na poslovima tehničkog rukovođenja u jamama ugroženim metanom i opasnom ugljenom prašinom ili tri (3) godine na poslovima provjetravanja jama ugroženim metanom i opasnom ugljenom prašinom i akreditirani laboratorij za ispitivanja iz člana 2. ovog Pravilnika ili Ugovor sklopljen sa pravnim licem koje posjeduje isti.

Član 5.

Potrebna laboratorijska ispitivanja za utvrđivanje eksplozivnih pokazatelja ugljene prašine mogu se obavljati u laboratorijama za protueksplzivnu zaštitu (ExLAB), akreditiranim za ispitivanje eksplozivnih pokazatelja zapaljivih medija prema zahtjevima EN ISO/IEC 17025, a shodno EN 45002, Opći kriteriji za ocjenjivanje laboratorija za ispitivanja od strane nadležnog evropskog tijela za akreditiranje. Akreditiranje laboratorija u Bosni i Hercegovini provodi Institut za akreditiranje BiH.

Nalaz o izvršenim laboratorijskim ispitivanjima eksplozivnih pokazatelja ugljene prašine je sastavni dio Elaborata za prašinu.

Član 6.

Pravna lica kojima projektovanje nije osnovna djelatnost, a registrovani su za obavljanje djelatnosti iz područja B - Vađenje ruda i kamena, razred: 05.20 - Vađenje uglja-lignita, mogu biti nosioci izrade Elaborata iz člana 1. ovog Pravilnika ako ispunjavaju uslove propisane čl. 3. i 4. ovog Pravilnika, i to samo u okviru posebnih organizacionih službi kao što su Služba za projektovanje i razvoj i Služba za provjetravanje.

Član 7.

Pravno lice koje je nosilac izrade Elaborata može sa pravnim licem za čije potrebe izrađuje Elaborat, ugovorom regulisati da se prenese dio poslova koji se odnose na mjerenja u jami ili laboratorijska ispitivanja ili da se angažuje stručni kadar

potreban za vršenje mjerenja i laboratorijskih ispitivanja, a koji ispunjavaju uslove propisane čl. 10. i 11. ovog Pravilnika, uz preciziranje obaveza i odgovornosti.

Član 8.

Uslovi propisani čl. 3., 4. i 5. ovog Pravilnika, pri izradi Elaborata za prašinu, odnose se kako za objekte u jami, tako i za objekte na površini (objekti pripreme, prerade i oplemenjivanja).

Član 9.

Provjera ispunjavanja uslova za obavljanje djelatnosti iz člana 3. ovog Pravilnika vrši se u skladu sa važećim propisima.

III. LICA ANGAŽOVANA NA IZRADI ELABORATA

Uslovi za odgovorna i ostala lica

Član 10.

Pravno lice koje je nosilac izrade Elaborata, rješenjem imenuje slijedeća odgovorna lica: Autora Elaborata, Nosioca mjerenja u jami i Nosioca laboratorijskih ispitivanja.

1. Autor Elaborata, mora biti diplomirani inženjer rudarstva sa položenim stručnim ispitom za tehničko rukovođenje, najmanje pet (5) godina radnog iskustva u struci, od čega najmanje tri (3) godine na poslovima tehničkog rukovođenja u jamama ugroženim metanom i opasnom ugljenom prašinom ili tri (3) godine na poslovima provjetravanja jama ugroženim metanom i opasnom ugljenom prašinom i mora biti zaposlenik pravnog lica koje je nosilac izrade Elaborata;

2. Nosioc mjerenja u jami mora biti diplomirani inženjer rudarstva sa položenim stručnim ispitom za tehničko rukovođenje i najmanje tri (3) godine rada u jami ugroženoj metanom i opasnom ugljenom prašinom,

3. Nosioc laboratorijskih ispitivanja mora biti diplomirani inženjer rudarstva, tehnologije ili hemije, sa položenim stručnim ispitom za tehničko rukovođenje i najmanje tri (3) godine radnog iskustva u struci.

Član 11.

Ostala lica angažovana na mjerenjima koncentracija metana i zaprašenosti i uzimanju uzoraka u rudarskim objektima i prostorijama mogu biti rudarski inženjeri koji imaju položen stručni ispit za tehničko rukovođenje i rudarski tehničari koji imaju položen stručni ispit za nadzor nad rudarskim radovima i najmanje dvije (2) godine rada u jami ugroženoj metanom i opasnom ugljenom prašinom.

IV. LISTA NOSILACA IZRADA ELABORATA

Zahtjev za stavljanje na listu

Član 12.

Federalno ministarstvo energije, rudarstva i industrije (u daljem tekstu: Ministarstvo) utvrđuje listu nosilaca izrade Elaborata za metan i listu nosilaca izrade Elaborata za prašinu.

Lista nosilaca izrade Elaborata sa podacima datim u obrascu, koji je sastavni dio ovog Pravilnika, objavljuje se na web stranici Ministarstva. (Prilog 1).

Član 13.

Pravno lice koje ispunjava uslove iz čl. 3. i 4. ovog Pravilnika podnosi zahtjev Ministarstvu za stavljanje na listu nosilaca izrade Elaborata.

Uz zahtjev iz stava 1. ovog člana prilaže se:

- Rješenje nadležnog organa o odobrenju obavljanja registrovanih djelatnosti iz člana 3. ovog Pravilnika;
- Izvod iz Pravilnika o organizaciji i sistematizaciji radnih mjesta, kao dokaz o ispunjavanju uslova iz člana 6. ovog Pravilnika, podnose pravna lica registrovana za obavljanje djelatnosti iz područja B-Vađenje ruda i kamena, razred: 05.20 - Vađenje uglja- lignita;
- Dokaz o akreditaciji laboratorije (ExLAB) za utvrđivanje eksplozivnih pokazatelja ugljene prašine ili Ugovor sklopljen sa pravnim licem koje posjeduje istu (za stavljanje na listu nosilaca izrade Elaborata za prašinu).

Stavljanjem na listu nosilaca izrade Elaborata, pravno lice stiče pravo na izradu Elaborata.

Član 14.

Ako federalni rudarski inspektor, u toku redovnog inspekcijskog pregleda, utvrdi i zapisnički konstatuje da pravno lice ne ispunjava propisane uslove za izradu Elaborata, Ministarstvo će po prijemu inspekcijskog rješenja, po službenoj dužnosti, skinuti pravno lice sa liste nosilaca izrade Elaborata.

Član 15.

O ispunjavanju uslova za stavljanje na listu nosilaca izrade Elaborata i brisanje sa liste, donosi se posebno rješenje koje potpisuje federalni ministar energije, rudarstva i industrije (u daljem tekstu: ministar).

V. PODNOŠENJE ZAHTJEVA ZA KATEGORIZACIJU

Potrebna dokumentacija

Član 16.

Zahtjev za pregled Elaborata i kategorizaciju jame i razvrstavanje jamskih prostorija prema stepenu opasnosti od metana i klasifikaciju i kategorizaciju jame, odnosno jamskih prostorija prema stepenu opasnosti od eksplozivne ugljene prašine (u daljem tekstu: kategorizaciju) podnosi se Ministarstvu.

Zahtjev za kategorizaciju podnosi pravno lice, za čije potrebe je rađen Elaborat.

Uz zahtjev je potrebno priložiti Elaborat u dva primjerka u koji se ulaže:

- Programski zadatak, u originalu;
- Rješenje o imenovanju odgovornih lica, u originalu;
- Dokaze o ispunjavanju uslova iz člana 10. ovog Pravilnika, za odgovorna lica (uvjerenja sa podacima o kretanju u službi, radnom stažu, položenom stručnom ispitu, da je zaposlenik kod pravnog lica koje je nosilac izrade Elaborata ili kod pravnog lica koje je angažovano po ugovoru iz člana 7), u originalu ili ovjerenoj kopiji;

- Pisana izjava da su mjerenja i uzimanje uzoraka vršila lica koja ispunjavaju uslove iz člana 11. ovog Pravilnika, potpisana od strane autora Elaborata i nosioca mjerenja u jami, a koja se prilaže i kao poseban akt, u originalu;
- Pisana izjava da su u Elaboratu primjenjeni uslovi iz člana 64. Zakona, potpisana od strane autora Elaborata, a koja se prilaže i kao poseban akt, u originalu;
- Nalaz o izvršenim laboratorijskim ispitivanjima ugljene prašine (za Elaborat za prašinu), u originalu ili ovjerenjima kopiji;

VI. KOMISIJA ZA KATEGORIZACIJU

Uslovi formiranja i rad Komisije

Član 17.

Po podnesenom zahtjevu, kategorizaciju vrši Komisija, koju u skladu sa važećim propisima rješenjem imenuje ministar.

Član 18.

Rješenje, pored Zakonom o upravnom postupku propisanog sadržaja sadrži i iznos naknade i rok u kome je podnosilac zahtjeva dužan izvršiti uplatu na ime naknade za obavljanje posla u korist Budžeta Federacije Bosne i Hercegovine, rok u kome je Komisija dužna izvršiti zadatak i naznaku da će se troškovi vođenja postupka (putni troškovi i dnevnice) utvrditi, shodno Zakonu o upravnom postupku.

Član 19.

Komisija se sastoji od predsjednika, tri člana i sekretara.

Predsjednik i članovi Komisije mogu biti diplomirani inženjeri rudarstva koji imaju položen stručni ispit za tehničko rukovođenje u rudarstvu, najmanje deset (10) godina rada u struci, od čega najmanje tri (3) godine na poslovima tehničkog rukovođenja u jamama ugroženim metanom i opasnom ugljenom prašinom ili tri (3) godine na poslovima provjetravanja jama ugroženim metanom i opasnom ugljenom prašinom. Predsjednik i članovi Komisije mogu biti zaposlenici Ministarstva, a u Komisiju se mogu imenovati i rudarski inženjeri koji nisu zaposlenici Ministarstva. Rudarski inženjeri koji nisu zaposlenici Ministarstva birati će se konkursom na period od pet (5) godina.

Sekretar Komisije mora imati najmanje višu stručnu spremu, položen ispit općeg znanja/ stručni ispit i pet (5) godina radnog iskustva u struci.

Član 20.

Kategorizacija se vrši na način da svaki član Komisije, nakon pregleda Elaborata, podnese pismeni izvještaj na osnovu koga voditelj postupka sastavlja zajednički izvještaj. Izvještaj o pregledu Elaborata potpisuje predsjednik Komisije i isti se dostavlja podnosiocu zahtjeva.

Nakon izvršenog pregleda Elaborata i dostavljanja izvještaja o pregledu, predsjednik Komisije je dužan u roku od osam (8) dana sazvati Komisiju radi kategorizacije.

U ovoj fazi rada Komisije obavezno je prisustvo Autora i ovlaštenog predstavnika pravnog lica za čije je potrebe rađen Elaborat.

Autor Elaborata je dužan dati odgovore i obrazloženje na eventualne primjedbe date u izvještaju o pregledu Elaborata, te nakon utvrđenog roka dati pismeni izvještaj o otklonjenim nedostacima koji je dužan zajedno sa izvještajem Komisije uložiti u Elaborat, a jedan primjerak dostaviti kao poseban akt.

Nakon otklonjenih nedostataka u zadatom roku pravno lice za čije je potrebe rađen Elaborat, dostavlja dva primjerka tvrdo ukoričenog Elaborata na uvid Komisiji.

Pod uslovom da su nedostaci u Elaboratu otklonjeni, te da su ispunjeni uslovi da se izvrši katekorizacija, ministar će u roku od osam (8) dana donijeti rješenje.

Član 21.

Po izvršenom zadatku Komisiji će se isplatiti naknada, u skladu sa važećim propisima.

Predsjedniku, članovima Komisije i sekretaru pripada naknada za rad, čiju visinu rješenjem određuje ministar. Visina naknada članovima Komisije se utvrđuje na osnovu troškovnika koga odobrava ministar.

VII. PRELAZNE I ZAVRŠNE ODREDBE

Prelazne odredbe

Član 22.

Pravna lica kojima je nadležni organ izdao Rješenja za obavljanje djelatnosti iz člana 3. ovog Pravilnika dužna su u roku od šest (6) mjeseci od stupanja na snagu ovog Pravilnika podneti zahtjev za uvrštavanje na listu nosilaca izrade Elaborata.

Pravna lica koja ne ispunjavaju uslov propisan članom 4. ovog Pravilnika, a koji se odnosi na akreditiranje laboratorija od strane nadležnog tijela prema članu 5, dužna su isti ispuniti u roku od dvanaest (12) mjeseci od stupanja na snagu ovog Pravilnika.

Prethodno izdatim rješenjem stečeno pravo za izradu Elaborata važi šest (6) mjeseci.

Završne odredbe

Član 23.

Ovaj Pravilnik stupa na snagu osmog dana od dana objavljivanja u „Službenim novinama Federacije BiH“.

Broj: 06-34-2139/10
12. oktobra 2011. godine
Mostar

Ministar
Erdal Trhulj

**BOSNA I HERCEGOVINA
FEDERACIJA BOSNE I HERCEGOVINE**

Prilog 1

**FEDERALNO MINISTARSTVO ENERGIJE,
RUDARSTVA I INDUSTRIJE**

LISTA NOSILACA IZRADE ELABORATA

Red. br.	Naziv pravnog lica koje je Nosilac izrade Elaborata	Adresa pravnog lica	Broj, datum i naziv organa koji je izdao Rješenje za obavljanje djelatnosti	Broj i datum izdavanja Rješenja o stavljanju na listu	Broj i datum izdavanja Rješenja o brisanju sa liste	Napomena

--	--	--	--	--	--	--